

# 1001 MASALAH

ABU AL-MUKHTAR SEDIA MENJAWAB



Pertanyaan daripada:

Abdul Latif bin Abdul Rahman,  
Malim Nawar – Perak.

Selepas berwuduk bolehkah air yang ada di anggota wuduk itu disapukan dengan kain atau saku tangan?

Jawab

Menyapu muka, tangan dan lain-lain anggota wuduk selepas daripada berwuduk itu adalah menjadi perbalahan di antara para ulama dan pengikut-pengikutnya, perbalahan-perbalahan ini berlaku dengan sebab adanya beberapa keterangan daripada hadith-hadith Nabi yang berlainan pendapat dalam soal tersebut. Dengan sebab itu terbahagilah mereka kepada tiga golongan:

Golongan yang pertama mengatakan: “Tidak boleh”.

Golongan yang kedua mengatakan: “Makruh”

Dan golongan yang ketiga mengatakan: “Harus atau boleh”.

Masing-masing golongan ada mempunyai dalil-dalil yang tertentu. Di bawah ini saya terangkan alasan-alasan yang diberikan oleh tiap-tiap golongan itu:

## Alasan golongan yang pertama:

Golongan yang pertama ini mengatakan: “Tidak boleh menyapu (mengeringkan) anggota-anggota wuduk selepas berwuduk.”

Alasan mereka ialah dengan membawa suatu hadith Rasulullah *ṣallā Allāhu ‘alayhi wa sallam* yang melarang berbuat demikian: Sabda Rasulullah *ṣallā Allāhu ‘alayhi wa sallam*: *“Idhā tawadda’tum fashrabū a‘yunukum min al-mā’ wa lā tanfaḍū aydikum min al-mā’ . . .”* (*Rawāḥu Abū Ḥātim*) Ertinya: “Apabila kamu telah berwuduk siramlah mata-mata kamu dengan air, dan janganlah kamu kibas tangan-tangan kamu daripada air wuduk itu! . . .” (Hadith diriwayatkan oleh Abu Hatim).

Dari hadith di atas teranglah menunjukkan bahawa apabila kita telah berwuduk, tidak boleh anggota-anggota wuduk itu kita keringkan dengan saku tangan atau sebagainya. Ini adalah merupakan suatu larangan daripada Rasulullah *ṣallā Allāhu ‘alayhi wa sallam*.

## Alasan golongan yang kedua:

Golongan yang kedua berpendapat: “Bahawa menyapu atau mengeringkan air pada anggota-anggota wuduk selepas berwuduk itu hukumnya makruh.” Golongan ini juga membawa suatu alasan daripada hadith Nabi *ṣallā Allāhu ‘alayhi wa sallam* yang berbunyi: *“Qālat Maymūnah: Adnaytu li rasūl Allāh *ṣallā Allāhu ‘alayhi wa sallam* ghuslahu min al-janābah . . . thumma ataytu bi al-mandīl faraddahu.”* (*S.R.<sup>1</sup> al-Bukhārī wa al-Nasā’ī*). Ertinya “Telah berkata

Maimunah: Aku pernah menyediakan bagi Rasulullah *ṣallā Allāhu ‘alayhi wa sallam* air mandi janabah . . . Kemudian aku bawa kepadanya saku tangan, tetapi ia tolak (tidak mahu menerima) saku tangan itu.” (Hadith Sahih diriwayatkan oleh Bukhari dan al-Nasa’ī).

Hadith ini menerangkan bahawa Rasul Allah setelah selesai mandi hadas besar lantas Saiyidatina Maimunah menghulurkan kepadanya saku tangan buat mengeringkan badannya, tetapi baginda telah menolak dan tidak mahu menerima saku tangan itu. Dengan penolakan ini bererti baginda tidak suka mengeringkan badannya dengan kain atau saku tangan itu. Sedangkan di dalam mandi janabah itu sudah terangkat wuduknya. Oleh kerana itu di dalam wuduk biasa pun seseorang itu tidak disukai (makruh) menyapu tangan, muka dan lain-lain anggota wuduknya dengan saku tangan atau lainnya. Di sana ada suatu hadith lain yang diriwayatkan oleh Anas:

“*An Anas, anna Rasūl Allāh *ṣallā Allāhu ‘alayhi wa sallam* lam yakun yamsaḥ wajhahu bi al-mandīl ba‘da al-wuḍū’ wa lā Abū Bakr wa lā Umar wa lā ‘Alī wa lā Ibn Mas‘ud.*” Ertinya: “Dari Anas, bahawa Rasulullah *ṣallā Allāhu ‘alayhi wa sallam* tidak pernah menyapu mukanya dengan saku tangan selepas berwuduk dan tidak pula Abu Bakar, tidak Umar, tidak Ali dan tidak Ibn Mas‘ud.” (Diriwayatkan oleh Ibn Shahin). Dan di dalam suatu riwayat yang lain al-Zuhri ada berkata:

“*An al-Zuhrī Qāla: Innāmā karrahu al-mandīl ba‘da al-wuḍū’ lianna al-wuḍū’ yūwazzin.*” Ertinya: “Dari al-Zuhri

<sup>1</sup> Sahih riwayat.

## 1001 Masalah

Ia berkata: Dibenci menggunakan sапу tangan sesudah berwuduk itu.

Tidak lain melainkan kerana wuduk itu akan ditimbang.”

Dari riwayat-riwayat hadis dan perkataan al-Zuhri yang tersebut di atas dapatlah diambil kesimpulan bahawa menyapu atau mengeringkan air yang di anggota wuduk selepas berwuduk itu adalah tidak disukai (makruh).

### Alasan golongan yang ketiga:

Golongan ini berpendapat: “Harus atau boleh mengeringkan anggota wuduk”, dengan alasan bahawa perbuatan mengeringkan anggota wuduk itu adalah termasuk di dalam urusan keduniaan dan tidak ada pula larangan dari segi agama, kerana hadith yang pertama itu sebagaimana tersebut di dalam kitab “*Ilal al-Hadīth*” tidak sah datangnya daripada Nabi *sallā Allāhu ‘alayhi wa sallam*. Oleh Imam Hatim hadith itu dianggap munkar dan tertolak.

Riwayat yang kedua itu bahawa perbuatan Rasulullah tidak mahu menerima sапу tangan yang diberikan oleh isterinya Saiyidatina Maimunah itu tidaklah menunjukkan baginda menganggap makruh menyapu anggota wuduknya, boleh jadi lantaran pada masa itu baginda Rasulullah belum mahu hendak mengeringkan anggota wuduknya itu.

Riwayat yang ketiga dari Anas pula tidak boleh dijadikan alasan lantaran hadith itu lemah riwayatnya.

Adapun riwayat yang keempat itu hanya satu fahaman biasa daripada Imam al-Zuhri, ia bukan hadith yang disabdarkan oleh Nabi *sallā Allāhu ‘alayhi wa sallam*. Imam al-Zuhri memberikan alasannya kerana wuduk itu nanti di Hari Kiamat akan ditimbang bersama-sama amal soleh, oleh kerana itu tidaklah patut disapu atau dikeringkan. Barangkali menurut pandangannya air wuduk itu boleh mengurangkan timbangan dosa.

Sebenarnya fahaman atau pendapat seseorang – terutama berhubungan dengan hukum – dengan tidak ada keterangan dari nas-nas atau dalil-dalil agama, maka itu tidaklah boleh kita jadikan alasan untuk menentukan sesuatu hukum.

Jadi keempat-empat dalil yang dikemukakan oleh golongan yang pertama dan golongan yang kedua itu adalah ditolak oleh golongan yang ketiga. Tegasnya golongan yang ketiga tetap mengharuskan bagi tiap-tiap orang yang berwuduk itu menyapu atau mengeringkan anggota-anggota wuduknya selepas ia berwuduk.

Alasannya ialah dengan mengemukakan suatu hadith Saiyidatina Aisyah yang diriwayatkan oleh al-Tirmizi dan al-Hakim yang berbunyi: “*An Ḥiṣḥah qālat: Kāna li Rasūl Allāh ‘alayhi wa sallam khirqah yatanshiqu bihā ba‘da al-wudū’*”. Ertinya: “Dari Aisyah ia berkata: Adalah bagi Rasulullah *sallā Allāhu ‘alayhi wa sallam* sehelai perca kain yang ia keringkan (anggota wuduk) denganannya selepas ia berwuduk.”

Hadith di atas sudah terang bahawa Rasulullah *sallā Allāhu ‘alayhi wa sallam* pada setiap kali baginda lepas berwuduk dikeringkannya anggota wuduknya dengan sehelai perca kain yang khas disediakkannya untuk menyapu anggota wuduknya itu, suatu hadith yang lain daripada Salman al-Farisi:

“*An Salmān al-Fārisī: Anna Rasūl Allāh ~~ṣallā Allāhu ‘alayhi wa sallam~~ tawaqqā faqalaba jubbatu ṣūf kānat ‘alayhi famasāha bihā wajhahu.*” (*Rawāḥu Ibn Mājah bi isnād ṣahīḥ*). Ertinya:

“Dari Salman al-Farisi: Bahawa Rasulullah *sallā Allāhu ‘alayhi wa sallam* pernah berwuduk lalu baginda balikkan jubah bulu yang dipakainya, lalu baginda menyapu mukanya dengan jubah itu.” (Diriwayatkan oleh Ibn Majah dengan sanad yang sahih).

Walaupun selain daripada dua riwayat di atas ada beberapa hadith lain yang menjadi perselisihan para ulama hadith tentang sahnya, di sana ada satu lagi hadith yang diriwayatkan oleh Ahmad, Ibn Majah, Abu Daud dan al-Nasa’i (nas Arabnya kami lupa), tetapi maksudnya ialah menerangkan bahawa Nabi Muhammad *sallā Allāhu ‘alayhi wa sallam* pernah memakai kain yang dicelup dengan *za’farān* (sejenis bau-bauan) buat mengelap badannya sesudah baginda mandi atau selepas berwuduk.

Jadi kami berpendapat, bahawa pendapat golongan yang ketiga inilah yang benar dan harus dipakai. Tegasnya tidak dilarang dan tidak makruh menyapu atau mengeringkan anggota wuduk dengan menggunakan sапу tangan, tuala ataupun lain-lain kain yang biasa digunakan untuk mengelap badan.

**Abu al-Moktar.**